

Nos tamen non latet, milites, ad sepulcri custodiam missos, non infimæ notæ Scriptoribus constasse, non Judæos, sed Gentiles fuisse. Cornelius a Lapide citatus, ad verba illa, *habetis custodiam*, addit: *Custodiam scilicet militum, idest custodes milites; quasi dixisset, habetis milites a me heri deputatos, vobisque datos ad Jesum crucifigendum, eunque in cruce usque ad mortem custodiendum: Nunc concedo, ut iisdem utamini ad custodiendum eum jam sepultum.* Et quia milites solos ad custodiam nolebat, ideo adjungit, ut & ipsi quoque Judæi sepultum custodirent. *Custodite ergo eum sicut scitis; idest optima ratione, & modo, quem nostis: Quasi dicat, modum custodiendi vestra scientia & prudentiæ permitto, ego amplius huic causæ immiscere me nolo. . . . Pro habetis græce est, ἔχετε, quod alii vertunt, quasi imperativam, habete; idest accersite Custodes. Nervosus noster vertit, in præsentem, habetis; jam enim habuerant milites custodes Christi in cruce, quos Pilatus eis dederat.*

At quis perhibere prohibet, tam in coronatione, quam in custodia, simul cum Judæis ministris Romanos quoque milites fuisse adhibitos? Judæi autem, quia Romanis subjecti, quia Sacerdotum ministri, viliora officia exercuerunt, flagellationem scilicet, & crucifixionem. Milites vero Romani coronarunt, ut illuderent; illuserunt, ut delectarentur; non autem flagellarunt, nec crucifixerunt eum, quanvis flagellationi, & crucifixioni adstantes, & assistentes fuissent. Dicere autem, quia quum reus religionis violatæ criminis haberetur, ad Sacerdotum ministros eum punire spectabat; nil ad rem facit, quia reum etiam majestatis læsæ eum fecerant, quando dixerunt, Cæsari prohibuisse dari censum, & se Judæorum Regem publi-